
GUILLEM DE BALAUN ou BALAZUC.

2701.

GUILLEM DE BALAUN fo un gentils castellas de ves Monpeslier. Adretz cavayers son e bon trobaires. Et enamoret se d'una gentil domna de Gavaudan, que avia nom madona Guilhalma de Javiac. Mot l'amet e la servi; e la dona l'amet tan que l dis e l fes so qu'el volc endreg d'amor.

Guilhem si avia un companho , per nom Peire de Barjac , valens et pros ; et amava él castel una avinen dona , na Ivernenca , la cal tenia P. de Barjac per cavayer , e n'avia tot son plazer. Abdueron drutz d'esta dona. Et avenc se qu'en Peire se corrosset ab sa dona , qu'ela li det comiat , don el s'en anet dolens. En Guilhem si l cofortet mot que no s desesperes , qu'el ne faria patz tantost cant tornaria à Javiac. Mot li fons grans lo termes ans que fos tornatz ; e tantost cant en Guilhem fon tornatz , el fetz patz d'en Peire e de sa dona , don Peire fo alegres pus que quan la conqueste de premier. Don el mezeis o dis à 'n Guilhem. En Guilhem dis qu'el o volia esproar , si'l joi de recobrar s'avia era tan grans co'l premier. E fetz se fort iratz à sa dona , et estet se que no l mandet messatje ni salut , ni no volc esser en tota l'encontrada d'ela. Don ela li mandet messatje ab letras amorosas , com ela s meravilhava com estava tan de lieys vezer. Et el com fols amans no volc auxir las letras , e fes donar comiat al messatje vilanamen. El messatje tornet s'en dolens comtar à sa dona com era estatz. La dona fon irada , et adordenet ab un cavayer del castel que sabia lo fag , que s'en anes à'n Guilhem de Balaun , e que saupes per que era aisi iratz contra ela ; e si avia fag res encontra luy que el s'en degues venjar , que ela 'n venria ad esmendamen à son voler.

Lo cavayer s'en anet à'n Guilhem e fon mal recebutz. E can lo cavayer l'ac dic son voler , el dis que no l dissera la occayzo , car el sabia be qu'ela era tals , qu'el non volia esmenda ni l devia perdonar. Lo cavayer s'en tornet e dis o à la dona. Adonc ela l mes en soan del tot ; et enaysi ela estet un gran temps.

E can venc jorn , en Guilhem se pensec com per son sol sen el perdia gran joy : montet en caval e venc s'en à Javiac ; et alberget ab un borzes , que no volc venir en cort. Ma dona Guilhalma saup qu'el era en vila , e can venc la nueg , que las gens forou colcadas , et ela issi del castel ab una dona et una donzela e venc à l'alberc. E se fe mostrar on jazia Guilhem de Balaun , e venc s'en al lieg on jazia ; e mes se de ginolh denan el e bayzet sa benda per lui bayzar , e querec li perdo del tort que non l'avia : et el non la volc recebre ni perdonar. E la dona parti se de lui ab cor que mais no l parles ; e penedet se de so que avia fag. Et el remas iratz car avia fach tal folor ; et levet se mati e venc s'en al castel , e dis que parlar volia ab ma dona Guilhalma per querre perdo. Madona Guilhalma cant o auzi fes li donar comiat , e dis no l veiria , e fes lo gitar del castel vilanamens. En Guilhem anet s'en trist e ploran ; e la dona remas dolenta e penedens de la humilitat c'avia facha. Et enaysi estec lonc temps que la dona no lo volc vezer ni auxir ; dont el adonc fes lo vers desesperat que di :

Men vers mou mercejan.

En B. d'Anduza, qu'era'l melhor hom de la encontrada, satp lo fag d'en Guilhem e de la dona; e montet à caval e venc s'en à Balaun. E parlet ab en Guilhem, e dis li co s podia far qu'el ages tant estat de vezer sa dona. En Guilhem contet li tot lo fag e la foldat que li era venguda. En B. cant auzi la razo tenc s'o à gran isquern, e dis li qu'el ne faria patz: don el n'ac mot gran gaug, cant auzi que s'en volia entrametre.

En B. s'en parti e venc s'en à Javiac, e contet tota la razon d'en G. à la dona, e com el era mot trist e dolent per la folia que s'avia pensada: e comtet li tot l'esquern, com o fes per esproansa. E la dona respos que mot s'en tenia per falhida, car tant s'era humiliada ad el. En B. li dis, que per so li era à perdonar enans, per lo dreg que era sieu el tort d'en G. E preget la'n aytan caramen co poc ni saup, que per dieu e per merce li perdone; e qu'ela'n prezes venjansa can li plazeria. E la dona l respos que pus el o volia ela l perdonaria, enaisi que per la falha qu'el fag avia, que se traisses la on gla del det menor; e qu'el la y degues portar ab un cantar, reprenen se de la folia c'avia facha.

En B. d'Anduza, quan vi que alres far non podia, pres comiat; et anet s'en à'n G. e dis li la resposta de la dona. En G. quant auzi que perdon trobaria fo molt alegres; e rendet li gracias, car tan li avia acabat ab sa dona. Tantost mandet per un maestre, e fes se traire la un gla ab gran dolor qu'en sofri; e fes son vers e venc s'en à Javiac, el e mo senher B. Ma dona Guilhalma issi lor encontra: en G. gitet se de ginolhs denant ela, queren merce e perdo, e presentet li la on gla. Ela son piantoza e levet lo sus; et intreron se totz tres en una cambra, et aqui ela lo perdonet baysan et abrassan. E retrais li son cantar, et ela l'entendet alegremen. E pueys ameron se pus fort trop que non avian fag enans.

2701, 7225-6.

Mon vers mou mercejan ves vos,
No per so, domna, qu'entenda
Que ja merce de meus prenda:
Tant es lo forfaitz cabalos,
Per qu'ieu si be m destrui no m planh.
Mas pos mi meteis ai perdut
E vos, que m faitz plus esperdut,
Si m pert mas paraulas be s tanh.

Tant

Tant es mos afars perilhos ,
Qu'ieu no sai co m'i emprenda ;
Que pregars qu'om no l'entenda
Val pauc ad home sofrachos ,
Per qu'es dregz que malastruc s lanh.
E pois per home recrezut
Aug dir qu'anc dieus no fetz virtut :
Per qu'ieu prec ses cug de gazan.

Be sai fallitz soi ad estros
E noi a mas qu'om me penda ,
Qu'ieu no soi qu'en dreg contenda :
Pero be sai si'l premier fos ,
Dretz fora no m cregues companh.
Mas si'l forfaitz fosson mort tu ,
Qu'om non agues merces avut ,
Mort e delit en foran manh.

Mala vengues aquel sazoz ,
Que mot crei que car lo m venda ;
Et està ben qu'ieu aprenda
En qual guiza viu besonhos ,
Quar ges tan ric joi no m'atanh.
Mas no sai co m'es avengut ,
Las ! non avia 'l ben saubut.
Aras lo sai , per que m complanh.

Domna , si ma mort vos es pros ,
Ja non er qu'ieu me defenda
Ni no m'auretz major renda ;
Et a'n pro qui es poderos
De celui vas qui a cor gran ,
Et a l'ops que merce l'ajut ;
Quar non es à merce tengut
Aisso en que'l poder sofranh.

Ai ! las , ta mala fui iros
Quan baises vas me sa benda ,
E m quis francamen esmenda
De so don degr' esser cochos ;
E m fi pregar d'avol barganh ,
Don m'a mil vetz lo cor dolgut :
Qu'era m tengr' ieu per errebut
Si m saludes com un estranh.

Domna , si tot no m tanh perdos ,
No laissarai nous mi renda
E mas mas no vos estenda ,
Que merces vens los mals e'ls bos.
E si pietatz tan vos franh ,
So qu'ieu non esper ni no cut ,
Que m perdonetz tort conogut ,
Si mais cai no m levetz del fanh.
